

Na osnovu člana 16. stav 4. Zakona o Vladi Zeničko-dobojskog kantona-Prečišćeni tekst („Službene novine Zeničko-dobojskog kantona“, broj 7/10), na prijedlog Ministarstva za prostorno uređenje, promet i komunikacije i zaštitu okoline Zeničko-dobojskog kantona, Vlada Zeničko-dobojskog kantona, na 170. sjednici, održanoj dana 24.06.2014. godine, d o n o s i

## **ZAKLJUČAK**

### **I.**

Utvrđuje se Prijedlog Odluke o izmjenama i dopunama Odluke o organizaciji i načinu obavljanja taksiprijevoza putnika na području Zeničko-dobojskog kantona.

### **II.**

Prijedlog Odluke iz tačke I ovog zaključka upućuje se u dalju skupštinsku proceduru.

### **III.**

Zaključak stupa na snagu danom donošenja.

Broj: 02-\_\_\_\_\_ /14.

Datum, 24.06.2014. godine

Z e n i c a

**PREMIJER**

*Munib Husejnagić, dipl.ing.maš.*

DOSTAVLJENO:

1x Ministarstvo za prostorno uređenje,  
promet i komunikacije i zaštitu okoline,  
1x Stručna služba Skupštine,  
1x a/a.

Na osnovu člana 37. stav 1. tačka f) Ustava Zeničko-dobojskog kantona, a u vezi sa članom 42. Zakona o cestovnom prijevozu Federacije Bosne i Hercegovine („Službene novine Federacije BiH“, broj 28/06 i 2/10), Skupština Zeničko-dobojskog kantona, na \_\_\_ sjednici, održanoj \_\_. \_\_. 2014. godine, donosi

**ODLUKU  
O IZMJENAMA I DOPUNAMA ODLUKE  
O ORGANIZACIJI I NAČINU OBAVLJANJA TAKSIPRIJEVOZA  
PUTNIKA NA PODRUČJU ZENIČKO-DOBOJSKOG KANTONA**

**Član 1.**

**(Izmjena člana 9.)**

U Odluci o organizaciji i načinu obavljanja taksiprijevoza putnika na području Zeničko-dobojskog kantona („Službene novine Zeničko-dobojskog kantona“, broj 6/10), član 9. mijenja se i glasi:

**“Član 9.**

**(Broj i razmještaj taksistajališta i broj taksivozila)**

- (1) Broj i razmještaj taksistajališta, broj stajališnih mjesta za taksivozila na taksistajalištima koja se nalaze na javnim površinama, kategoriju taksistajališta i ukupan broj taksivozila, odnosno ukupan broj dopunskih taksioznaka utvrđuje svojim aktom nadležna općinska služba vodeći računa o broju stanovnika, organizovanosti javnog prijevoza putnika, broju i razmještaju javnih institucija i objekata, općem stanju saobraćaja, dnevnoj migraciji stanovništva, konfiguraciji tla i drugim uvjetima, kao i o iskazanim potrebama korisnika prijevoza.
- (2) Ukupan broj taksivozila iz stava (1) ovog člana utvrdit će nadležna općinska služba koristeći propisani zakonski omjer jedno taksivozilo na 500 - 1.000 stanovnika.
- (3) Za broj stanovnika za utvrđivanje omjera iz stava (2) ovog člana koristiće se zvanični statistički podaci do objavljivanja zvaničnih podataka prema popisu stanovništva iz oktobra mjeseca 2013. godine.
- (4) Akt iz stava (1) ovog člana nadležna općinska služba dužna je dostaviti Ministarstvu za prostorno uređenje, promet i komunikacije i zaštitu okoline Zeničko-dobojskog kantona (u daljnjem tekstu: Ministarstvo) najkasnije 15 dana nakon stupanja na snagu istog.”

**Član 2.**

**(Izmjena člana 10.)**

Član 10. mijenja se i glasi:

**“Član 10.**

**(Način korištenja, red i rad na taksistajalištima)**

- (1) Način korištenja, red i rad na taksistajalištima, te raspored taksivozila na taksistajalištima i kriterije za raspored taksivozila na taksistajalištima uređuje i donosi nadležna općinska služba aktom na koji saglasnost daje Ministarstvo.
- (2) Nadležna općinska služba obavezna je u septembru tekuće godine raspisati javni poziv za raspored taksivozila na taksistajalištima za narednu godinu i sačiniti raspored taksivozila na taksistajalištima na osnovu jasno utvrđenih i transparentnih kriterija iz stava (1) ovog člana.
- (3) Javni poziv iz stava (2) ovog člana objavljuje se u službenim novinama općine, na službenoj web stranici i u dnevnom listu.
- (4) Nadležna općinska služba dužna je Raspored taksivozila na taksistajalištima dostaviti Ministarstvu do 15. januara tekuće godine.
- (5) Taksistajalište na području jedne općine mogu koristiti samo taksiprijevoznici sa te općine.“

**Član 3.**  
**(Izmjena člana 11.)**

U članu 11., stavovi (4), (5) i (6) se brišu.

**Član 4.**  
**(Dopuna i izmjena člana 12.)**

U članu 12., u stavu (1), iza riječi „rasporediti“ dodaje se riječ „najviše“.  
Stav (2) se briše.

**Član 5.**  
**(Izmjena člana 14.)**

Član 14. mijenja se i glasi:

**„Član 14.**  
**(Cjenovnik usluga)**

- (1) Cjenovnik usluga mora biti ovjeren od Ministarstva i istaknut na vidnom mjestu u taksivozilu.
- (2) Ministarstvo na zahtjev taksiprijevoznika ovjerava cjenovnik usluga.
- (3) Cjenovnik usluga se ovjerava uz naknadu.
- (4) Cjenovnikom usluga se određuje cijena:
  - a) početka vožnje (start);
  - b) vožnje po pređenom kilometru;
  - c) čekanja;
  - d) noćne vožnje, vožnje nedjeljom i praznikom;
  - e) prijevoza prtljaga.
- (5) Cijena taksiprijevoza se utvrđuje taksimetrom po cjenovniku usluga.
- (6) Cijena taksiprijevoza na relacijama dužim od 25 km može se ugovoriti i bez uključenja taksimetra, s tim da cijena ne može biti veća od one koja bi se utvrdila taksimetrom.
- (7) Prije početka prijevoza iz stava (6) ovog člana taksiprijevoznik je dužan izdati kartu za prijevoz putniku koji se prevozi na utvrđenoj relaciji.
- (8) Karta za prijevoz treba da sadrži:
  - a) registarski broj vozila;
  - b) putnu relaciju;
  - c) naplaćenu, odnosno ugovorenu cijenu;
  - d) datum prijevoza;
  - e) potpis i otisak pečata taksiprijevoznika.“

**Član 6.**  
**(Dopuna člana 15.)**

U članu 15., u stavu (2), iza riječi „taksistajalište“, stavlja se zarez i dodaju riječi: „potvrdu o registraciji za vozilo koje ima registarske tablice koje počinju slovnim oznakom “TA””.

**Član 7.**  
**(Dopuna i izmjena člana 16.)**

U članu 16., u stavu (4), iza riječi “raspoređena” dodaje se riječ „najviše“, a iza riječi „(dva)“ brišu se riječi: „ili maksimalno 3 (tri)“.

**Član 8.**  
**(Dopuna i izmjene člana 17.)**

U članu 17., iza stava (1), dodaje se novi stav (2) koji glasi:  
„(2) Uz dopunsku taksioznaku iz stava (1) ovog člana taksiprijevoznik je dužan dostaviti dokaz o odjavi registarskih tablica koje počinju slovnim oznakom “TA” za vozilo.”  
Stav (6) se briše.  
Dosadašnji stavovi (2), (3), (4) i (5), postaju stavovi (3), (4), (5) i (6).

**Član 9.**  
**(Izmjena člana 28.)**

U članu 28., u stavu (1), broj „30“ zamjenjuje se brojem „60“.  
Stav (2) se briše.

**Član 10.**  
**(Izmjena člana 30.)**

Član 30. mijenja se i glasi:

**„Član 30.**  
**(Ovjera cjenovnika usluga)**

Taksiprijevoznik je dužan podnijeti zahtjev za ovjeru cjenovnika usluga iz člana 14. stav (2) ove odluke u roku od 30 dana od dana stupanja na snagu ove odluke.”

**Član 11.**  
**(Izmjena člana 31.)**

Član 31. mijenja se i glasi:

**„Član 31.**  
**(Obaveza polaganja ispita)**

- (1) Taksivozač koji nema položen poseban ispit iz člana 24. ove odluke obavezan je u roku od šest mjeseci od dana stupanja na snagu ove odluke položiti poseban ispit.
- (2) Taksivozaču koji ne položi poseban ispit u roku iz stava (1) ovog člana oduzeti će se licenca prijevoznika za taksiprijevoz.”

**Član 12.**  
**(Izmjena člana 33.)**

U članu 33., stav (2) se briše.

**Član 13.**  
**(Brisanje člana 34.)**

Član 34. se briše.

**Član 14.**  
**(Izmjena člana 35.)**

Član 35. mijenja se i glasi:

**“Član 35.**  
**(Rok za donošenje akata)**

- (1) Nadležna općinska služba je dužna akt iz člana 9. stav (1) odluke donijeti u roku od 60 dana od dana stupanja na snagu ove odluke.
- (2) Do donošenja akta iz stava (1) ovog člana i davanja saglasnosti na akt iz člana 10. stav (1) odluke primjenjivat će se akti koji su bili na snazi do donošenja ove odluke.”

**Član 15.**  
**(Ovlaštenje)**

Ovlašćuje se Zakonodavno-pravna komisija Skupštine Zeničko-dobojskog kantona da utvrdi prečišćeni tekst odluke.

**Član 16.**  
**(Stupanje na snagu)**

Ova odluka stupa na snagu osmog dana od dana objavljivanja u „Službenim novinama Zeničko-dobojskog kantona“.

Broj: \_\_\_\_\_ /14  
Datum, \_\_\_\_\_ 2014. godine  
Zenica

**PREDSJEDAVAJUĆI**  
**Sretko Radišić, s.r.**

## Obrazloženje

### Pravni osnov

Pravni osnov za donošenje Odluke o izmjenama i dopunama Odluke o organizaciji i načinu obavljanja taksiprijevoza putnika na području Zeničko-dobojskog kantona utvrđen je u članu 37. stav 1. tačka f) Ustava Zeničko-dobojskog kantona („Službene novine Federacije BiH“, broj 7/96 i „Službene novine Zeničko-dobojskog kantona“, broj 1/96, 10/00, 8/04 i 10/04) i u odredbama člana 10. i člana 42. Zakona o cestovnom prijevozu Federacije Bosne i Hercegovine („Službene novine Federacije BiH“, broj 28/06 i 2/10) u kojima je utvrđeno da će Skupština kantona svojim propisom urediti organizaciju i način obavljanja taksiprijevoza putnika na svojoj teritoriji.

### Razlozi za donošenje

Skupština Zeničko-dobojskog kantona na sjednici održanoj 25.05.2010. godine donijela je Odluku o organizaciji i načinu obavljanja taksiprijevoza putnika na području Zeničko-dobojskog kantona („Službene novine Zeničko-dobojskog kantona“, broj 6/10). (u daljem tekstu: Odluka).

Predmetna Odluka je dostavljena Konkurencijskom vijeću BiH od strane fizičke osobe, taksiprijevoznika iz Tešnja, s ciljem analize njene usklađenosti sa odredbama Zakona o konkurenciji („Službeni glasnik BiH“, broj 48/05, 76/07 i 80/09).

U aktu Konkurencijskog vijeća BiH, broj: 01-26-10-317-I/13 od 14.11.2013. godine, koji je zaprimilo ovo Ministarstvo 21.11.2013. godine, se navodi da neke odredbe Odluke nisu u skladu sa odredbama Zakona o konkurenciji, te se preporučuje nadležnim organima da u što kraćem vremenu usklade odredbe navedene Odluke sa odredbama pomenutog zakona, te ukazuju da će u slučaju da se ne provede njihova data preporuka, Konkurencijsko vijeće pokrenuti postupak po službenoj dužnosti, u skladu sa odredbama Zakona o konkurenciji, te da može izreći novčanu kaznu, u smislu člana 48. istog Zakona.

Imajući u vidu date preporuke u aktima Konkurencijskog vijeća BiH, broj: 01-26-10-317-I/13 od 14.11.2013. godine, broj: 01-26-10-317-4-I/13 od 07.01.2014. godine, broj: 01-26-10-317-7-I/13 od 06.02.2014. godine i broj: 01-26-10-317-11-I/13 od 11.03.2014. godine, Ministarstvo je izradilo Prijedlog Odluke o izmjenama i dopunama Odluke o organizaciji i načinu obavljanja taksiprijevoza putnika na području Zeničko-dobojskog kantona na koji je aktom, broj: 01-26-10-317-13-I/13 od 10.04.2014. godine, dobilo mišljenje Konkurencijskog vijeća BiH o usaglašenosti tog Prijedloga Odluke sa Zakonom o konkurenciji.

S obzirom da se radi o preporukama Konkurencijskog vijeća BiH, to je osnovni razlog da Ministarstvo pokrene aktivnosti na izmjeni Odluke, te stoga predlaže Vladi Zeničko-dobojskog kantona da utvrdi Prijedlog Odluke o izmjenama i dopunama Odluke o organizaciji i načinu obavljanja taksiprijevoza putnika na području Zeničko-dobojskog kantona i uputi ga u dalju skupštinsku proceduru.

Napominjemo, kako je Konkurencijsko vijeće BiH dalo pozitivno mišljenje o Prijedlogu Odluke o izmjenama i dopunama Odluke o organizaciji i načinu obavljanja taksiprijevoza putnika na području Zeničko-dobojskog kantona time će biti riješene i inicijativa općine Tešanj za davanje autentičnog tumačenja Odluke o organizaciji i načinu obavljanja taksiprijevoza putnika na području Zeničko-dobojskog kantona („Službene novine Zeničko-dobojskog kantona“, broj 6/10), inicijativa Imamović Mehmeda iz Tešnja za izmjenu i dopunu Odluke o organizaciji i načinu obavljanja taksiprijevoza putnika na području Zeničko-dobojskog kantona („Službene novine Zeničko-dobojskog kantona“, broj 6/10) i inicijativa Piro Amira, vijećnika Općinskog vijeća Tešanj, za izmjenu Odluke o organizaciji i načinu obavljanja taksiprijevoza putnika na području Zeničko-dobojskog kantona („Službene novine Zeničko-dobojskog kantona“, broj 6/10) pomenute u aktu Kolegija Skupštine, broj: 01-01-23459-3/13 od 18.11.2013. godine.

### Finansijski efekti

Za provođenje ove odluke nisu potrebna dodatna sredstva u Budžetu Kantona.

*Handwritten signature*



*Handwritten mark*